

# 1 PIDELU

## Ini Sa Muna Igsulat I Pidelu

### Ini Denu Sa Muna Igsulat I Pidelu

*Na, si Pidelu sa sebaen salu i Hésus Kelistu hinemilî di anî tumegudon. Egoh di migsulat ini i, tigtu dé lukes. Igpeuwit di siini surat diyà sa medoo etaw egpigtuu diyà si Hésus Kelistu nesepalak diyà sa medoo menuwa diyà uwang tanà Asiya. Iya sa pesuwan da nesepalak enû ka sinalidan da sa tigtu menuwa da egoh da nepelihat danà sa medoo etaw endà egpigtuu diyà si Hésus.*

*Migsulat Pidelu i diyà kenagda anî kumebagel sa pedu da, enû ka egpekeukit siini medoo etaw i Hésus diyà sa lihay da danà da egpangunut diyà si Kelistu. Huenan di, eg-ikagiyan i Pidelu kagda anî meanggan da polo, enû ka iya sa pesuwan da egkepelihay danà da egpigtuu diyà si Hésus, owoy tigtu endà salidan i Hésus Kelistu duu kagda. Owoy duen sa untung ibegay i Nemula diyà kenagda kani amuk meeles sa kepangunut da si Hésus.*

*Igsulat i Pidelu ma diyà kenagda anî pepionen da sa adat da anî mekeiling da sa adat sa etaw i Kelistu.*

### Ini Sa Edungan Kagi I Pidelu

**1** <sup>1</sup>Na, aken si Pidelu salu i Hésus Kelistu sa egsulat ini i.

Egsulat a diyà keniyu i medoo etaw hinemilî i Nemula nesepalak diyà sa medoo tanà beken sa tigtu menuwa yu, owoy eg-ugpà yu dé diyà sa uwang Ponto owoy uwang Galatiya owoy uwang Kapadosiya owoy uwang Asiya owoy uwang Bitiniya. <sup>2</sup>Na, danà sa penemdem i Nemula sa Emà ta, hinemilî di kiyu egoh anay anî egpetiengawen di kiyu danà

sa Suguy di anî mangunut yu ma diyà si Hésus Kelistu, enû ka nekepeuloy ma dé sa medoo salà yu danà sa depanug di.

Na, egsimbà a anî meumanan pa sa mepion ketabang ipeuloy i Nemula diyà keniyu owoy meumanan ma sa melanih keugpà yu.

### Duen Sa Mepion

#### Eg-angat-angatan Ta Danà Sa Kapatay I Hésus

<sup>3</sup>Na, tigtu meolò ta Nemula i sa Emà i Hésus Kelistu sa Datù ta. Enû ka danà sa dakel kehidu

di kenita, inanak di dé kita  
owoy egbegayan di ma kita sa  
lalù endà meelut di. Huenan di,  
duen sa eg-angat-angatan ta  
danà i Nemula mig-enaw si  
Hésus Kelistu egoh di nematay.  
4Eg-angat-angatan ta ma sa  
tigtu mepion ipeuloy i Nemula  
diyà kenita i etaw di. Iya sa  
igtagù di dutu langit dò kenà di  
endà meledak owoy endà ma  
medaetan di owoy endà ma  
mekedan di. 5Danà sa dakel  
egkegaga di, egtulikan i Nemula  
doo kita i etaw egpigtuu diyà  
kenagdi taman endà meuma sa  
agdaw egoh di petuu sa kealuk  
di kenita. Tinapay di dé iya wé,  
owoy ipehaa di kani diyà kenita  
amuk meuma sa sabuhanan  
agdaw.

6Huenan di, keanggan yu dé  
ini egoh di danà iya wé  
egbaelan i Nemula. Apiya di pa  
melugaylugay sa egoh yu  
mebukul danà sa medoo  
balangan kelikutan egkehaa yu  
ini egoh di, keanggan yu doo.  
7Ini sa pesuwan di egkelikutan  
yu anì mehaa amuk tuu sa  
kepigtuu yu ataw ka endà. Sa  
kepigtuu yu lagà bulawan  
egtapisen etaw diyà apuy anì  
metiigan amuk tuu bulawan  
ataw ka beken. Apiya di pa  
milagà sa bulawan, melemu doo  
mekedan. Dodoo uman pa  
milagà sa kepigtuu yu, huenan  
di peukiten i Nemula kiyu diyà  
sa kelikutan yu anì mehaa amuk  
tuu sa kepigtuu yu ataw ka

endà. Amuk tigkelan yu iya wé,  
oloen i Nemula kiyu owoy  
pedakelen di ma kiyu kani  
amuk meuma sa agdaw sa  
kepehaa i Hésus Kelistu. 8Apiya  
di pa endà eghauwen yu duu  
Hésus i, eghiduwan yu doo  
kagdi, owoy apiya di pa endà  
eghauwen yu duu ini egoh di,  
egpigtuuwen yu doo. Huenan  
di, egkeanggan yu temù. Endà  
metulon yu duu sa kekeanggan  
yu enù ka dakel temù.

9Egkeanggan yu temù enù ka  
egpigtuu yu dé diyà kenagdi,  
huenan di egkealukan di kiyu  
denu sa salà yu.

10Na, sa medoo tegesugkow i  
Nemula egoh anay, mig-udes da  
eg-inau denu siini kealuk i  
Nemula kenita, owoy tinulon da  
ma mekeuma kani sa mepion  
ketabang ipeuloy i Nemula diyà  
kenita. 11Egoh anay igsugkow  
da sa igpetiig sa Suguy i Kelistu  
diyà kenagda, owoy tinulon da  
ma dumuen sa kelikutan  
mekeuma diyà si Kelistu egoh di  
diyà tanà, agulé pedakelen i  
Nemula amuk meelut sa  
kelikutan di. Iya sa tinulon da  
egoh anay, dodoo endà dé  
netiigan da duu sa egoh di  
meketuu ataw ka sa ukit i  
Nemula mael iya wé, huenan di  
mig-udes da eg-inau denu iya  
wé. 12Dodoo igpetiig i Nemula  
ma diyà kenagda endà meketuu  
sa kagi di igsugkow da denu si  
Kelistu egoh da endà pa  
nematay. Dodoo kita polo sa

mighaa sa egoh di neketuu sa kagi i Nemula igsugkow da. Neketuu dé iya wé, owoy iya ma dé sa igtulù diyà keniyu ini egoh di. Igtulù sa etaw diyà keniyu sa Mepion Tegudon denu si Hésus danà sa tunung sa Metiengaw Suguy pineangay i Nemula. Tigtu mepion temù iya wé Tegudon igtulù da diyà keniyu, huenan di ungayà sa medoo egsugùsuguen i Nemula metiigan da ma hedem.

**Ini Sa Igsasà I Pidelu Anì  
Petiengawen Sa Etaw Sa Adat Da**

13Na, danà yu neketiig iya wé, tuliki yu dé sa penemdem yu denu sa langun egbaelan yu. Mepion amuk metulanged yu, owoy angat-angati yu ma sa tigtu mepion ibegay i Nemula diyà kenita kani amuk meuma sa kepehaa i Hésus Kelistu. 14Danà yu dé anak i Nemula, pangunut yu dé diyà kenagdi. Egoh anay egoh yu endà pa neketiig sa tuu tegudon, eg-unutan yu sa medaet ungayà sa pedu yu. Dodoo yoko dé eg-uman na eg-unut iya wé. 15Petiengaw yu polo sa langun adat yu, enù ka metiengaw Nemula i sa mig-umow keniyu anì migtuu yu. 16Enù ka iya sa kagi i Nemula igpesulat, guwaen di, “Petiengaw yu dé sa

adat yu, enù ka aken sa metiengaw.”<sup>a</sup>

17Na, amuk egsimbà yu diyà si Nemula, eg-umow yu kenagdi si Emà. Huenan di, tigtu yu dé pepion sa keadat yu kenagdi ligò yu eg-ugpà pelà diyà tanà, enù ka kagdi sa megay untung diyà sa langun etaw denu sa binaelan sa uman sebaen etaw, owoy metudà ma sa kekukum di. 18Netiigan yu egoh anay lagà yu neudipen diyà sa adat yu endà milantek tinangtang sa medoo tupù yu, dodoo linaun i Nemula dé kiyu kedu diyà iya wé. Egoh di mig-aluk kenita, beken iya sa igtigtu di sa bulawan ataw ka sa pilak melemu mekedan sa lagà di. 19Dodoo inalukan di kita danà sa tigtu milagà depanug i Hésus Kelistu miglesut egoh di nematay diyà sa kayu igbugsud anì tigtuwan di sa salà ta. Kagdi lagà sa tigtu mepion kebibibili endà duen kulang di inimatayan. 20Egoh anay egoh i Nemula endà pa migbael tanà, tapay dé hinemilì di Kelistu i, dodoo igpehaa di dé ini egoh di anì alukan di kita. 21Danà i Kelistu, nekepigtuu yu dé diyà si Nemula sa mig-enaw kenagdi egoh di nematay owoy sa migpedakel kenagdi dutu langit dò. Huenan di, si Nemula sa

<sup>a</sup> 1:16 Basa ko Lébitiko 11:44,45; 19:2; 20:7.

egsaligan ta egbegay sa langun eg-angat-angatan ta.

22Na, danà yu migpangunut diyà sa tuu tegudon, kinedanan yu dé sa medaet adat yu owoy tigtu eghiduwan yu ma sa duma yu egpigtuu. Apiya di pa tigtu yu mehidu, umani yu pa sa kesehiduway yu, 23enù ka anan yu dé anak i Nemula owoy duen ma sa lalù yu endà meelut di. Beken danà sa medoo lukes yu sa lalù yu enù ka mematay da doo, dodoo danà yu polo migpigtuu diyà sa kagi i Nemula egpelalù etaw taman melugay. Endà ma mekedan sa kagi di, 24enù ka iya sa kagi i Nemula igpesulat, guwaen di,

“Lagà keluwen sa langun etaw diyà tanà  
owoy lagà bulok keluwen sa lalag da.

Lumegupay sa keluwen owoy menabù ma sa bulok di.

25 Dodoo endà mekedan sa kagi i Nemula taman melugay.”<sup>b</sup>

Na, sa kagi i Nemula, iya sa Mepion Tegudon denu si Kelistu tinulon etaw diyà keniyu.

**Si Kelistu Sa Tigtu Mapulù Owoy  
Kita Sa Etaw I Nemula**

**2** 1Na, danà yu dé anak i Nemula, kedani yu dé sa langun adat yu medaet. Yoko

egbutbut ta, owoy yoko ubdubò ya egbael mepion. Yoko ma big-ilayamen na, owoy yoko ma egpeumàumà duu sa duma yu. 2Dodoo takà yu ilingi sa tuu kagi i Nemula lagà sa batà magtu miglesut takà egkeiyap egsusu. Amuk hediya, lumenuk sa kepigtuu yu taman sa egoh yu mealukan. 3Iya sa mepion ungayaen yu, enù ka hinaa yu dé sa tigtu mepion ketabang sa Datù ta.

4Na, tigtu yu unuti temù si Datù Hésus sa egpelalù etaw taman melugay. Kagdi lagà sa batu inekedan etaw migbael dalesan enù ka guwaen da dò endà duen lantek di, dodoo kagdi polo sa hinemilì i Nemula enù ka tigtu mapulù.

5Binegayan di ma kiyu sa lalù taman melugay, huenan di lagà yu ma sa batu diyà sa dalesan egbaelan i Nemula. Diyà sa dalesan di, kiyu lagà sa medoo tegeimatay hinagtay igbegay etaw diyà si Nemula enù ka hinemilì i Nemula kiyu anì gumalebek yu diyà kenagdi. Beken hinagtay sa ibegay yu diyà si Nemula, dodoo ibegay yu polo sa kepigtuu yu owoy sa keolò yu ma kenagdi danà sa binaelan i Hésus Kelistu anì metuuwan Nemula i diyà keniyu. 6Enù ka duen sa kagi i Nemula igpesulat, guwaen di,

<sup>b</sup> 1:24-25 Basa ko Isayas 40:6-8.

“Hinemilì ku dé sa tigtu  
mapulù batu  
sa petigdegan ku sa dalesan  
egbaelan ku diyà sa  
menuwa Siyon.  
Sumalà dé sa etaw egpigtuu  
diyà kenagdi,  
endà dé mebukul di danà sa  
kepigtuu di.”<sup>c</sup>

<sup>7</sup>Na, si Hésus Kelistu lagà siedò  
mapulù batu hinemilì i Nemula,  
owoy kagdi ma sa tigtu mapulù  
diyà kenita i etaw egpigtuu.  
Dodoo, neketuu dé sa kagi i  
Nemula igpesulat denu sa  
medoo etaw endà egpigtuu,  
guwaen di,

“Sa sebaen batu inekedan sa  
medoo egbael dalesan  
pulung batu  
enù ka guwaen da dò endà  
duen ulan di,  
iya polo sa tigtu miulan batu  
hinemilì ku.”<sup>d</sup>

<sup>8</sup>Duen ma sa kagi i Nemula  
igpesulat, guwaen di,

“Iya sa batu kenà etaw  
mekebigkil,  
owoy iya sa kenà da  
mekekinagpà.”<sup>e</sup>

Tuu iya wé, enù ka lagà da  
nekebigkil danà da eg-eked  
egpigtuu sa kagi i Nemula.  
Huenan di, lagà da nekekinagpà  
enù ka iya sa uyot i Nemula  
diyà sa medoo etaw endà  
egpigtuu.

<sup>9</sup>Dodoo kiyu i etaw  
egpigtuu, kiyu sa hinemilì i  
Nemula. Lagà yu sa medoo  
tegeimatay hinagtay igbegay  
da diyà si Nemula enù ka  
migpangunut yu dé diyà sa  
tigtu mapulù Datù ta. Kiyu  
ma sa metiengaw etaw  
egsabaan di, owoy kiyu ma sa  
etaw i Nemula. Hinemilì di  
ma kiyu anì tumulon yu sa  
langun mepion binaelan di,  
enù ka egoh di mig-umow  
keniyu anì migtuu yu, lagà  
hinalì di kiyu kedu diyà sa  
deleman anì egpeangayen di  
kiyu diyà sa tigtu milegdaw.

<sup>10</sup>Egoh anay beken etaw i  
Nemula kiyu, dodoo ini egoh  
di kiyu dé sa etaw di. Egoh  
anay endà pa netiigan yu duu  
sa kehidu i Nemula keniyu,  
dodoo ini egoh di sinakem yu  
dé sa kehidu di.<sup>f</sup>

#### **Ungayà I Nemula Ilingan Ta Sa Metiengaw Adat**

<sup>11</sup>Na, o medoo duma ku  
eghiduwan ku, beken ki sa  
tigtu etaw dahini enù ka beken  
siini tanà sa tigtu menuwa ta,  
enù ka langit polo. Huenan di,  
egsasaen ku kiyu, yoko eg-unut  
duu sa medaet ungayà sa  
tapay pedu yu, enù ka  
medaetan sa keunut yu diyà si  
Nemula danà sa medaet

<sup>c</sup> 2:6 Basa ko Isayas 28:16. <sup>d</sup> 2:7 Basa ko Isalem 118:22. <sup>e</sup> 2:8 Basa ko Isayas 8:14. <sup>f</sup> 2:10 Basa ko Osiyas 1:6,9; 2:23.

ungayà yu. <sup>12</sup>Pepion yu polo sa adat yu diyà sa medoo etaw endà pa egpigtuu, enù ka apiya di pa egtipuwen da kiyu, mehaa da doo sa mepion egbaelan yu. Huenan di oloen da ma Nemula i amuk meuma sa agdaw egoh i Nemula pehaa diyà kenagda.

<sup>13</sup>Na, pangunut yu dé diyà sa langun uledin gubilenu, enù ka kiyu sa etaw egpigtuu diyà si Datù Nemula. Pangunut yu ma diyà sa sulutan enù ka kagdi sa egsabà sa langun kedoo ta. <sup>14</sup>Owoy pangunut yu ma diyà sa gubilenu, enù ka binegayan sa sulutan kagda egkegaga anì pigtamayan da sa etaw migtipay uledin owoy oloen da ma sa etaw egbael mepion. <sup>15</sup>Igsasà ku iya wé diyà keniyu, enù ka iya sa uyot i Nemula takà yu mael mepion anì sumabuh sumigbolow sa medoo etaw endà neketiig. <sup>16</sup>Linaun i Nemula dé kita diyà sa salà ta, huenan di mekehemilì ki sa egbaelan ta. Dodoo beken iya sa pesuwan di miglaun kenita anì mael ki medaet, dodoo linaun di polo kita anì tigtu ki mekeiling sa udipen i Nemula takà egbael mepion. <sup>17</sup>Adati yu sa langun etaw, owoy hiduwi yu ma sa langun duma yu egpigtuu. Tulik yu anì endà mael yu sa endà meiyapan i Nemula duu, owoy adati yu ma sa sulutan ta.

### **Igsasà I Pidelu Anì Ilingan Da Kelistu I**

<sup>18</sup>Na, kiyu i egsugùsuguen, adati yu sa ulu-ulu yu owoy pangunuti yu ma sa langun igsugù da keniyu, iling ka amuk mehidu da owoy mepion adat, ataw ka mebalaw da. <sup>19</sup>Enù ka amuk metigkelan yu sa kepelihay da keniyu, apiya di pa endà duen sa medaet egbaelan yu, metuuwan doo Nemula i diyà keniyu, enù ka netiigan yu iya sa uyot di diyà keniyu. <sup>20</sup>Dodoo amuk egkepigtamayan yu danà sa medaet binaelan yu, apiya di pa metigkelan yu iya wé, tapay doo endà metuuwan Nemula i diyà keniyu. Dodoo, amuk metigkelan yu sa lihay yu apiya di pa mepion sa egbaelan yu, iya sa kenà i Nemula metuuwan diyà keniyu. <sup>21</sup>Enù ka iya sa ungayà i Nemula metigkelan yu sa langun kelikutan yu. Taa yu, duen ma sa kelikutan tinigkelan i Kelistu egoh di mig-aluk kenita. Kagdi sa meilingan ta anì metigkelan ta ma sa kelikutan ta, enù ka hinemilì i Nemula kita anì meilingan ta Kelistu i. <sup>22</sup>Endà duen sa salà binaelan di, owoy endà ma egbutbut di. <sup>23</sup>Egoh da migpeumàumà kenagdi, endà migsulì di egsagbì medaet. Egoh da migpelihay kenagdi, endà ma migsulì di, dodoo igسالig di daa polo sa kesulì di diyà si

Nemula, sa metudà kekukum.  
 24Egoh i Hésus nematay diyà sa kayu igbugsud, binaba di sa langun salà ta anì ekekan ta sa kebael ta medaet anì kumetiengaw ma sa adat ta. Danà sa egoh di netamay egoh iya, nelikuan ki dé. 25Egoh anay egoh yu endà pa egpigtuu, lagà yu sa kebilibili netelas. Dodoo ini egoh di nekepelikù yu dé diyà si Kelistu sa tegeipat kenita owoy sa tegetulik kenita.

**Ini Sa Mepion Egbaelan Sa Etaw  
 Épê Sawa**

**3** 1Na, kiyu i bayi épê sawa, pangunut yu dé diyà sa sawa yu, enù ka apiya di pa endà pa egpigtuu da sa kagi i Nemula, mekepigttuu da doo kéen danà da eghaa sa mepion adat yu. Endà duen sa pesuwan yu egtatudon diyà kenagda, 2enù ka metuuwan da doo amuk eghauwen da sa metiengaw adat yu owoy sa kiadat yu diyà si Nemula. 3Yoko ma egpenemdem duu kumetolol yu danà sa medoo igsihì yu diyà sa balut ulu yu ataw ka sa medoo mapulù eg-uwit-uwiten yu éhê bulawan igpedeket diyà sa lawa yu ataw ka sa mapulù ginis igluhub yu. 4Dodoo mepion amuk iya polo sa ketolol yu sa adat yu mepion danà sa pedu yu metiengaw, enù ka iya sa tigtu mapulù diyà sa kehaa i Nemula sa pedu yu melénég owoy sa kagi yu

mepion. Amuk hediya sa ketolol yu, endà mekekan di taman melugay. 5Hediya ma sa medoo bayi migpigtuu diyà si Nemula egoh anay. Migsalig da diyà si Nemula owoy metolol da danà da migpangunut diyà sa sawa da. 6Hediya ma si Sala sawa i Abraham egoh anay, enù ka migpangunut diyà sa sawa di owoy pinelagà di dé datù di. Na, mebaluy ma kiyu sa tugod i Sala amuk metiengaw sa adat yu iling kenagdi owoy endà ma duen sa melimedangan yu.

7Na, kita i maama épê sawa, ipaten ta ma sa sawa ta enù ka endà neketepeng sa hagda kebagel diyà sa kebagel ta, owoy adatan ta ma kagda enù ka begayan i Nemula ma kagda lalù endà meelut di éhê mendaa sa ibegay di kenita. Pangunuti yu dé ini i igsasà ku anì endà mealang sa kesimbà yu diyà si Nemula.

**Mepelihay Ki Danà Ta  
 Egbael Mepion**

8Na, duen pa sa itulù ku diyà keniya langun. Sesebaen yu daa sa penemdem yu owoy sa pedu yu ma. Sehiduway yu ma enù ka lagà yu dé setelehadiyay. Pepion yu ma sa pedu yu diyà sa duma yu, owoy petukééy yu ma kiyu i diyà kenagda. 9Amuk duen etaw egbael medaet diyà keniya, yoko egsulì duu. Owoy amuk duen etaw egpeumàumà keniya, yoko ma egpeumàumà

duu. Dodoo simbai yu polo anì tabangan i Nemula kagda, enù ka egoh di mig-umow keniyu anì migtuu yu, igpasad di sa ketabang di keniyu. <sup>10</sup>Enù ka duen sa kagi i Nemula igpesulat, guwaen di,

“Sumalà dé sa etaw ungayà di sa lalù di

owoy sa mepion kehagtayan di diyà tanà,

endà mikagi di medaet

owoy endà ma mutbut di.

<sup>11</sup>Ekedan di ma sa langun

kebael di medaet

anì pulung mepion sa egbaelan di.

Owoy eg-udesan di ma

egpelanih sa keugpà sa medoo duma di.

<sup>12</sup>Enù ka egtulikan i Nemula

sa etaw egbael mepion,

owoy egdinegen di ma sa kesimbà da.

Dodoo egkuntelaen di polo sa

etaw egbael medaet.”<sup>g</sup>

<sup>13</sup>Huenan di, amuk eg-udes yu egbael mepion, lagà endà duen sa etaw melihay keniyu.

<sup>14</sup>Dodoo apiya di pa

egkepelihay yu danà yu egbael mepion, meanggan yu doo.

Yoko egkelimedangan na diyà sa etaw daa, owoy yoko ma

egkebukul la. <sup>15</sup>Dodoo tigtu adati yu polo Kelistu i sa Datù

ta. Tapay yu dé penemdem sa sagbì yu diyà sa etaw eg-igsà keniyu denu sa kepigtuu yu anì mesagbian yu, sumalà dé sa igsaen da. <sup>16</sup>Amuk sumagbì yu diyà kenagda, pepion yu sa pedu yu diyà kenagda owoy adati yu ma kagda. Tulik yu ma anì anan mepion sa egbaelan yu. Agulé amuk duen etaw egsumbung keniyu denu sa mepion adat yu danà yu eg-unut diyà si Kelistu, kagda polo sa memalaan danà sa inikagi da medaet. <sup>17</sup>Amuk iya sa ungayà i Nemula mepelihay yu danà sa mepion egbaelan yu, mepion doo iya wé. Dodoo endà mepion di amuk mepelihay yu danà sa medaet binaelan yu.

<sup>18</sup>Mebaluy doo mepelihay yu danà yu egbael mepion, enù ka nematay Kelistu i diyà sa kayu igbugsud anì tigtuwan di sa salà ta apiya di pa endà duen sa hagdi salà. Segulê daa sa kepatay di enù ka nekeenget dé sa ketigtu di sa salà ta, huenan di egseupionen di kita si Nemula. Apiya di pa nematay sa lawa di, neenaw doo.

<sup>19</sup>Mig-angay sa suguy di dutu bayà dò kenà da nebilanggu sa medoo suguy etaw nematay egoh anay, owoy migtegudon diyà kenagda. <sup>20</sup>Iya sa suguy sa

<sup>g</sup> 3:10-12 Basa ko Isalem 34:12-16.

medoo etaw endà migpigtuu diyà si Nemula egoh i Nuwi migbael dakel kumpit egoh anay. Metaes pelà sa tali i Nemula egoh di eg-angat-angat sa kepigtuu da taman sa egoh di neubus sa kumpit i Nuwi. Dodoo egoh di migdagpak sa dakel kemahà, walu daa sa etaw mig-edà kumpit sa Nealukan i Nemula diyà sa wayeg.<sup>h</sup> 21Na, sa kealuk di kenagda egoh anay, iya lagà sa kealuk i Nemula kenita ini egoh di danà sa kepebautis ta diyà wayeg. Egoh ta egpebautis, beken iya sa kenà ta egkedan sa lued lawa ta, dodoo egtandaan ta polo sa kepegeni ta diyà si Nemula anì kedanan di sa salà ta anì metiengaw sa pedu ta. Nealukan ki doo danà i Hésus Kelistu neenaw egoh di nematay. 22Migpelikù dé dutu langit dò, owoy migpenuu denu kuwanan i Nemula. Kagdi sa kaunutan sa langun eg-ugpà diyà langit, sa medoo egsugù-suguen i Nemula owoy sa langun épê egkegaga.

**Nesambian Sa Adat Sa  
Etaw Egpigtuu**

**4** 1Na, netiigan ta nepelihat Hésus Kelistu i egoh di pelà diyà tanà. Huenan di, amuk mehaa yu sa kelikutan yu, pebagel yu dé sa pedu yu anì

meilingan yu sa hagdi ketigkel. Amuk mepelihat sa etaw, mekedan sa ungayà di mael salà. 2Huenan di, pedakel yu diyà sa pedu yu sa keunut yu diyà sa uyot i Nemula egoh yu pelà diyà tanà. Amuk hediya, endà dé munut yu diyà sa medaet ungayà sa pedu yu. 3Egoh anay medoo sa medaet binaelan yu iling sa egbaelan sa medoo etaw endà egpigtuu diyà si Nemula. Egoh iya, medaet temù sa adat yu, owoy tegebìgà yu owoy tegepehilu yu owoy endà ma duen sa kemala yu egbael medaet amuk eg-inem yu mekehilu, owoy endà ma eg-adatan yu duu Nemula i danà yu egpenemula sa inetaw. 4Dodoo ini egoh di tigtu negaip sa medoo etaw endà egpigtuu eg-unutan yu egoh anay, enù ka endà dé eg-unutan yu duu kagda egbael medaet, huenan di egpeumàumaan da dé kiyu. 5Dodoo petigdegen i Nemula doo kagda kani diyà sa taengan di anì igsaan di kagda denu sa langun binaelan da diyà tanà, enù ka buyu dé meuma sa ketepeng di sa langun etaw, iling ka nehagtay ataw ka nematay. 6Na, sa medoo etaw nematay dé, tinulonon da sa Mepion Tegudon denu si Hésus egoh anay anì melalù da taman melugay lagà sa kelalù i

<sup>h</sup> 3:20 Basa ko Génesis 6:1-7:24.

Nemula, apiya di pa nematay da danà sa tapay kepigtamay i Nemula etaw.

**Setabangay Ki Danà Sa Ketabang  
I Nemula Kenita**

7Na, medapag dé meuma sa sabuhanan agdaw. Huenan di, pepion yu sa penemdem yu owoy tuliki yu ma sa langun egbaelan yu anì endà duen sa mekealang sa kesimbà yu. 8Ini sa tigtu mepion egbaelan yu, sehiduway yu temù, enù ka amuk eghiduwan yu sa duma yu, mekepeuloy yu doo sa salà da apiya di pa medoo sa salà da. 9Amuk duen etaw eglengen diyà keniyu, pepion yu kagda ipat. Yoko egkesemek ka.

10Na, duen medoo balangan egkegaga igbegay i Nemula diyà uman sebaen kenita. Huenan di, pepion yu sa keipat yu sa egkegaga sinakem yu anì setabangay yu langun. 11Amuk kuna sa binegayan i Nemula egkegaga anì tumegudon, iya daa sa itegudon ko sa kagi i Nemula. Amuk kuna sa tegebulig duma ko, udesi ko buligi enù ka egbegayan i Nemula kuna sa egkegaga ko. Sumalà dé sa igsugù i Nemula keniyu, pepion yu sa kebael yu anì meolò Nemula i danà sa tabang i Hésus Kelistu keniyu, enù ka kagdi daa sa meolò ta owoy kagdi daa sa épê dakel egkegaga taman melugay.

**Mepelihay Yu Danà Yu Etaw  
I Kelistu**

12Na, o medoo duma ku eghiduwan ku, duen sa dakel egkelikutan nekeuma diyà keniyu ini egoh di anì tepengan sa kepigtuu yu. Dodoo yoko egkegaipan duu iya wé, owoy yoko ma egpenemdem duu kiyu daa sa egkepelihay. 13Dodoo keanggani yu polo iya wé, enù ka nesesebaen yu dé si Kelistu egoh di nepelihay. Amuk metigkel yu iling sa hagdi ketigkel, tigtu yu meanggan kani amuk mehàa ta sa dakel egkegaga di amuk meuma sa kepelikù di. 14Meanggan yu doo amuk egpeumàumaan etaw kiyu danà yu eg-unut diyà si Kelistu, enù ka iya sa tandà di eg-ugpà diyà keniyu sa Metiengaw Suguy i Nemula épê dakel egkegaga. 15Dodoo endà mepion di amuk iya sa pesuwan yu egkepelihay danà yu mig-imatay etaw ataw ka migpenakaw yu ataw ka migtipay yu uledin ataw ka tegebogo yu duma yu. 16Dodoo amuk egkepelihay yu danà yu egpigtuu diyà si Kelistu, yoko egkemalaan na, dodoo olò yu polo Nemula i enù ka kiyu dé sa pinengadanan etaw i Kelistu.

17Na, neuma dé sa egoh i Nemula eg-edung egkukum sa langun etaw, owoy kita i etaw di sa muna kukumen di anì kedanan di sa medaet binaelan

ta. Amuk kita sa muna kukumen di, uman pa medaet sa mebaelan kani sa medoo etaw endà egpigtuu diyà sa Mepion Tegudon igpetiig i Nemula diyà kenagda. <sup>18</sup>Duen sa kagi i Nemula igpesulat, guwaen di,

“Amuk melikut sa kealuk sa medoo metiengaw etaw, endà dé mealukan sa medoo etaw tegebael salà endà egpigtuu diyà si Nemula.”<sup>i</sup>

<sup>19</sup>Huenan di, amuk iya sa ungayà i Nemula egkepelihay yu ini egoh di, yoko egkesemek ka egbael mepion. Dodoo tigtu yu salig polo diyà si Nemula, enù ka kesaligan Nemula i sa migbael kenita.

#### **Ini Sa Mepion Adat Ta Diyà Sa Umpungan I Hésus**

**5** <sup>1</sup>Na, duen ma sa isasà ku diyà keniyu i medoo kaunutan etaw egpigtuu, enù ka aken ma sa kaunutan etaw egpigtuu. Tigtu hinaa ku sa lihay i Hésus Kelistu egoh anay, owoy mekeunut a ma sa dakel egkegaga di kani enù ka buyu dé pehaa. Huenan di, ini sa isasà ku diyà keniyu, <sup>2</sup>ipat yu temù sa medoo etaw egpigtuu igسالig i Nemula diyà keniyu, enù ka kiyu sa lagà tegeipat kebibibili. Endà mepion di amuk

sa keipat yu kenagda danà sa pedu yu netegel, dodoo ipat yu polo kagda danà sa melanilh pedu yu enù ka iya sa uyot i Nemula diyà keniyu. Endà ma mepion di amuk iya daa sa pesuwan yu eg-ipat kenagda danà yu eg-ungayà sa sukay, dodoo ipat yu polo danà sa ungayà yu egtabang kenagda. <sup>3</sup>Yoko egpeges duu sa etaw egtuluen yu, enù ka igسالig i Nemula kagda diyà keniyu. Dodoo baeli yu polo sa mepion, enù ka kiyu sa eg-ilingan da. <sup>4</sup>Amuk pelikù Kelistu i, sa tigtu mapulù tegeipat sa medoo kebibibili i Nemula, ibegay di diyà keniyu sa tigtu metolol untung endà mekedan di taman melugay.

<sup>5</sup>Hediya ma kiyu i medoo batàbatà, pangunut yu dé diyà sa kaunutan yu. Yoko egpedakel duu kiyu, dodoo petukééy yu polo kiyu langun diyà sa duma yu, enù ka duen sa kagi i Nemula igpesulat, guwaen di,

“Sa etaw egpedakel kenagdi, iya sa etaw egkuntelaen i Nemula.

Dodoo sa etaw egpetukééy kenagdi, iya sa etaw egtabangan i Nemula.”<sup>j</sup>

<sup>6</sup>Huenan di, petukééy yu kiyu diyà sa kehaa i Nemula épê dakel egkegaga, enù ka amuk

<sup>i</sup> 4:18 Basa ko Milantek Kagi 11:31. <sup>j</sup> 5:5 Basa ko Milantek Kagi 3:34.



*Sa kuntelà ta si Satanas sa lagà liyun egpeketues. (1 Pidelu 5:8)*

meuma sa pasad di, pedakelen di doo kiyu. 7Sumalà dé sa kebukulan yu, saligi yu diyà kagdi, enù ka kagdi doo sa eg-ipat keniyu.

8Hahaa yu owoy tulik yu ma, enù ka sa kuntelà ta si Satanas sa lagà liyun egpeketues takà eglagbet sa mekaen di. Hediya ma takà eglagbet Satanas i sa ukit kesigkem di kenita anì mekedan sa kepigtuu ta.

9Huenan di, ekedi yu dé kagdi ya owoy peeles yu sa kepigtuu yu, enù ka netiigan yu beken kiyu daa sa egkepelihay ini egoh di, dodoo egkepelihay ma sa langun дума yu egpigtuu diyà siini sinukub langit.

10Apiya di pa egkepelihay yu ini egoh di, endà melugay di mekedan. Amuk meubus sa

lihay yu, guluben i Nemula kiyu owoy peelesen di ma sa kepigtuu yu owoy pebagelen di ma kiyu, enù ka kagdi sa keduwan sa langun ketabang keniyu owoy hinemilì di kiyu anì kiyu sa etaw di mekeunut kenagdi taman melugay danà yu nesesebaen si Kelistu.

11Huenan di, meolò Nemula i sa épê dakel egkegaga taman melugay.

#### **Ini Sa Sabuhanan Kagi I Pidelu**

12Na, si Silas sa migbulig kenak egsulat ini i diyà keniyu. Kagdi ma sa дума ta egpigtuu owoy kesaligan ma. Apiya di pa mepokò daa ini i igsulat ku diyà keniyu, igpesulat ku doo ini i anì peelesen yu sa kepigtuu yu. Ungayà ku metiigan yu tuu sa

dakel ketabang ipeuloy i  
Nemula diyà keniyu, huenan di  
yoko egpeulan duu iya wé.

13Na, sa medoo duma yu  
egpigtuu hinemilì i Nemula  
dahini diyà sa menuwa  
Babiloniya, ipetulon da sa  
mepion pedu da diyà keniyu.  
Hediya ma ipetulon i Malkos  
ma sa mepion pedu di diyà

keniyu. Kagdi sa anak ku danà  
sa kepigtuu di.

14Na, amuk egkesetipon yu,  
pehauwi yu sa kesehiduway yu  
danà yu egpigtuu.<sup>k</sup>

Egsimbà a anì melanìh sa  
keugpà yu, kiyu i langun etaw i  
Kelistu.

Na, taman iya daa sa kagi ku.  
Si Pidelu

---

<sup>k</sup> 5:14 Mebaluy ma guwaen di, “Ingadeki yu sa medoo duma yu egpigtuu danà sa  
kehidu yu kenagda.”